

終南毓秀何佳哉羣靈訶護昇天臺當年瞻
彼現紫氣青牛果自東方來煙霞縹緲駐仙
輅琅函燦燦留瓊瑰忽乘丹鳳返碧落幾見
滄海飛塵埃老柏再生復千載森森蔭此玄
門開坡仙題品刻翠琰我來拂拭生莓苔傳
經不待意已化後人胡為乎疑猜河山百二
特一覽頓然曾次生崔嵬秋煙澹澹日已暝
信眉一笑空裴回

世傳玄元出關圖像儀失實因稽古
訂正命姚安仁寫之琬琰傳示諸方
嘉其筆力精峭為作山偈以贈之

朱象先

青牛西出關千載紀玄瑞云何傳此像儀刑
失初意每為識者嫌尤重嗣者愧我我南山
臺授道有遺址諸方號指南正謠當在是巖
石擬寫真適遭姚處士靜思閱三日一掃已
大備河山認峭函衣冠見周世聖真欣會遇
道氣盈天地將開清靜門要醒舉世醉再讓
仍再進洞見當時禮疑勝不似畫我疑親側
侍君能狀此圖天機一何遠曾中妙丘壑幽

妍生筆底豈令張與吳獨擅畫家美寶帖散
寰海追美三千歲名同金石傳會從此日始
奉題希聲堂 張廣微
大道元非語默傳紫雲何事洩重玄當時賴
是無言說紙上枯來已五千

贈別一虛空

杜南谷

海陵仙人一虛子方瞳玄鬢長如此曾中一
點天地真清氣逼人過秋水我昔被君居燕
然掛劍長春偶相會別去笑指黃金臺翻然
西度函關外浮空紫氣上終南穩駕青牛休
地肺煙霞猿鶴爭歡迎疑是玄元見文始丹
峯樓觀尚依然摩挲古柏正逾醉從茲與了
未了緣莫向時人話前事今猶古今古猶今
天上人間復何異不須忙去昇崐崙道遠且
住人間世他年我亦事西游分席經臺授玄
旨

古樓觀紫雲行慶集卷下

玄天上帝啟聖錄卷之一

流一

金闕化身

按三寶大有金書云一炁分形靈虛生五劫
之宗三清出號神景化九光之始太初溟津
玄極冥蒙中有虛皇分置五劫曰龍漢曰赤
明曰上皇曰延康曰開皇當斯時也天光未
分清濁未判則知三炁為天地之尊九炁為
萬真之本是故

元始象先天開明三景造立天根五文開廓
普植神靈太極一判天地始明東分青九南
受丹三西成白七北歸玄五中生黃一號為
五老即玄黃植象之根也五老各布始炁化
成四靈以定四隅周環六合兩儀運乎其中
推成萬物以此考源明

玄帝果先天始炁五靈玄老太陰天一之化
按混洞赤文所載玄帝乃先天始炁太極別
體上三皇時下降為太始真人中三皇時下
降為太初真人下三皇時下降為太素真人
黃帝時下降符太陽之精託胎於淨樂國王
善勝皇后孕秀一十四月則太上八十二化

也淨樂國乃蓋姜之下海外之國上應龍變梵度天也

王宮誕聖

是時正當上天開皇初劫下世歲建甲辰三月戊辰初三日甲寅庚午時

玄帝產母左脇當生之時瑞雲覆國天花散

漫異香芬然身寶光燄充滿王國地土皆變

金玉瑞應之祥莫能備載

經書默會

玄帝生而神靈舉錯隱顯聰以知遠明能察

微年及七歲經書一覽仰觀俯視靡所不通

潜心念道志契太虛願事

上帝普福兆民

辭親慕道

玄帝長而勇猛不統王位惟務修行輔助

玉帝誓斷天下妖魔救護群品日夜於王宮

發此誓願父王不能抑志年十五辭父母而

尋幽谷內鍊元真

元君授道

玄帝念道專一遵感玉清聖祖紫元君傳授

無極上道元君告玄帝曰子可越海東游歷

於翼軫之下有山自乾元起跡盤旋五萬里

水出震宮自有太極便生是山上應顯定極

風太安皇崖二天有七十二峰三十六巖也

子可入是山擇東峰之中冲高紫霄者居之

當契太和昇舉之後五百歲當上天龍漢二

劫中披髮跣足躡坎離之真精歸根復位上

為三境輔臣下作十方大聖方得顯名億劫

與天地日月齊并是其果滿也告畢元君昇

雲而去

天帝錫劍

玄帝乃如師言越海東游又感豐乾大天帝

授以寶劍天帝告曰此劍名曰北方黑龍表

角斷魔雄劍長七尺二寸應七十二候撫三

輔應三台重二十四斤應二十四炁潤四寸

八分應四時八節子可佩此居山修鍊降伏

邪道收斬妖魔告畢天帝昇雲而去玄帝受

訖歷翼軫之下果見是山山藏水沒皆符師

言於是入山渡澗擇地隱居內修

其山在均州之南三舍先名太和一名仙

室一名大嶽也玄帝昇真之後謂曰非玄

武不足以當之故更名曰武當嵩高之儲

副五嶽之流華也周迴八百里七十二峰

三十六巖二十四洞五臺五井三潭三泉

四石三天門三洞天一福地風穴雷洞藥

圃丹爐霄館龍官慶雲彩霧幽蘭清蕙萬

乳天花石露金銀之星樹有松蘿之秀騫

林葉尤能愈疾靈壽杖可以扶衰神獸呈

祥仙禽奏樂

御寶宸翰護教鎮山黑虎巡廊烏鴉報曉

艾名千歲廣施博濟之功松號萬年彭美

報恩之德茂林脩竹人傑地靈得道神仙

不可勝計圓山聖跡莫能備陳效萬古之

烟霞歸一原之造化也

澗阻群臣

父王思慕太子不能棄捨令大臣領兵五百

眾根尋太子回朝探逐所往渡澗入山遇澗

水忽漲不能前進八次渡過水泛第九次方

得渡至紫霄巖面見太子啓傳王命自是部

眾足忽僵仆不能舉相謂曰太子願力所至

如是回國且遣乃同聲告曰願從太子學道

語畢跬步如故於是俱隱山中帝昇真之後皆證仙道今武當有五百靈官者是也澗名九渡阻其意焉

童真內鍊

玄帝登山首於太子巖棲隱帝修真時有靈鴉報曉黑虎衛巖每食必餌之至今二物通靈皆證大神時隱時見烏鴉啄赤見之者昌黑虎驅奸逆之者殃

按總真集云武當黑虎大神乃北方天一所化護教守山之靈正直威顯變化不一或託相為人金甲皂袍若將軍之狀或現真相玄鬚黑色如獅子之形或大如麋或小如豹或雪裏而現其跡或泥中而顯其蹤見之者不祥夢之者獲慶夜巡廊廡靈跡昭垂不善之人立為屏斥丹經云虎向水中生是也有秘法傳之於世行焉今天一真慶宮嘉慶閣下有黑虎巖靈鳥者秉北方之黑色為武當之靈神預報吉凶驗其慈厲靡不應者且則群噪為之報曉然物我相忘略不驚避晨夕二供飛翔伺

食內一紅喙者或隱或現見之者為嘉瑞云爾

悟杵成針

玄帝修鍊未契玄元一日欲出山行至一澗忽見一老媪操鐵杵磨石上帝揖媪曰磨杵何為媪曰為針耳帝曰不亦難乎媪曰功至自成帝悟其言即返巖而精修至道老媪者乃聖師紫元君感而化焉澗曰磨針因斯而名雲麓仙人磨針澗詩曰淬礪功多麤者精聖師邀請上天京我心匪石堅於石小器成而大道成

折梅寄柳

玄帝自悟磨針之語復還所隱於途折梅枝寄於柳樹上仰天誓曰子若道成花開果結後如其言今樹尚存名曰柳梅者乃柳木梅實桃核杏形味酸而甜能愈諸疾然亦罕得之以驗豐歉豐年結實荒歲則無下有仙翁司之敬禮可得玉谿真人詩曰高真學道隱山時親折梅枝寄柳枝行滿功成應沖舉花開子結識先知仙翁護境百邪遠聖果標名

萬古垂服餌延齡除痼疾志誠拜受福相隨蓬萊仙侶

玄帝歸巖修鍊之時嘗有九美人相貌端嚴儀矩殊異往來帝所感試帝心帝默識之必聖人也故加敬禮女仙乃謂帝曰子輩蓬萊仙侶特來試之功行者已宜加精進尅日沖舉語畢跨鶴而昇今稱蓬萊九師是也仙侶之巖由此而名焉

紫霄圓道

玄帝在山往來觀覽見七十二峰之中有一峰上聳紫霄下有一巖當陽虛寂於是採師之誠目山曰太和山峰曰紫霄峰巖曰紫霄巖據此居焉即成道之所今天一真慶宮是也

聖訓云吾山不及諸山富諸山不及吾山清吾山冬寒而不寒夏熱而不熱三世為人方到吾山五世為人方住吾地七世為人方葬吾境吾山寂寂草萋萋只聞鐘鼓不聞鷄汝若有緣居此地吾令六甲斬三尸七十二峰接天青二十四澗水長鳴三

十六巖多隱士葬在吾山骨也清又云南有降魔北金鎖膽必驚兮登必阻劫終劫始剪妖精留得佳名垂萬古呂純陽真人詩曰混沌初分有此巖此巖高聳太和山面朝天頂峰千丈背湧甘泉水一灣石縷

狀成飛鳳勢巖龕縮就碧螺製靈源仙澗三方繞古檜蒼松四面環雨滴瓊珠敲石棧風吹玉笛響松關角鷄報曉東方見晚鶴歸來北斗彎谷口仙禽常喚語山巖神默任躋攀箇中自是乾坤大就裏元來日

月閑自古玄真修道處至今蹤跡在人間不知多少神仙侶為愛名山去復還有碑存焉

五龍捧聖

玄帝在巖潛虛玄一默會萬真四十二年矣大得上道於黃帝五十七年歲次庚子九月丙戌初九日丙寅清晨忽有祥雲天花自空而下彌滿山谷四方各三百里林巒震響自作步虛仙樂之音是時帝身長九尺面如滿月龍眉鳳目紺髮美髯顏如冰清頭頂九炁玉冠身披松蘿之服跣足拱手立于紫霄峰

上須臾五炁龍君捧擁駕雲而昇至大頂天柱峰乃止時有五真偕群仙降于帝前導從甚盛非凡見聞

三天詔命

是時玄帝稽首祇奉迎拜五真曰予奉

三清玉帝詔命以子功滿道備昇舉金闕子之聖父聖母已昇九霄矣帝俯伏恭諾五真乃宣詔曰學仙聖童淨樂園子惟卿玄元之化天一之尊不言而教莫知其神渺渺劫仞綿綿若存虛心實腹和光同塵鑿開造化橫散胚輝六百萬歲八十二身曲全在直窪盈弊新生陰育陽起死成人其功不恃其德乃真今宜再顯高輔三清上罰逆象下滅妖氛掌握圖籙攝制魔障帝真靈會驅神駕龍甲庚之將贊術爾勳周環六合普福兆民道參天地萬真所推可特拜太玄元帥領元和遷校府公事賜九德偃月金晨玉冠瓊華玉簪碧瑤寶圭素綃飛雲金霞之帔紫綃龍袂丹霞羽楊絳絲之裙七寶鍊衣元光朱履飛紅雲鳥佩太玄元帥玉冊乾元寶印南北二斗

三台龍劍飛雲玉輅丹與綠輦羽蓋瓊輪九色之節十絕靈幡前嘯九鳳後吹八鸞天丁玉女億乘萬騎上赴九清詔至奉行天眞皇人

白日上昇

玄帝拜受天詔易服訖五真曰予乃九天五

老天君准

上帝命與子啓途至午時帝乘丹輿綠輦羽蓋瓊輪馭九色玄龍揚十絕靈幡前後鸞歌鳳唱嘯歌鸞飛鳴應節朗耀雲衢玉女散花金童揚煙浮空上昇

玉陛朝參

玄帝飛昇至金闕朝參玉陛上帝告曰卿往鎮北方統攝玄武之位以斷天下邪魔時帝白上帝曰臣宿緣慶幸得親天顏功行卑微奚堪重任上帝告曰卿道參天地萬真所推幸勿謙辭帝奉玉旨謝恩而退乃居天一真慶官如詔命

真慶仙都

玄帝所居之宮則曰天一真慶宮在紫微北
上太素秀樂禁上天太虛無上常融天二天
之間宮殿巍峩皆自然妙炁所結琳琅玉樹
靈風自鳴皆合宮商之韻紅光紫雲常覆其
上此處則玉虛無色界也

玉清演法

按元洞玉曆記云至五帝世當上天龍漢二
劫下世洪水方息人民始耕殷紂主世淫心
失道矯侮上天生民方足衣食心無正道日
造罪愆惡毒自橫致六天魔王引諸鬼衆傷
害衆生毒氣盤結上衝太空是時

元始天尊與諸天上帝說法於玉清聖境八
景天宮天門震闢下見惡氣彌塞天光於是
妙行真人叩誠求請願救群黎天尊告曰汝
之懇請不亦善乎非勇果材安能制斷惟此
方位天奧之區其方有神名號真武玄天之
性以正推邪降伏妖魔歸於正道妙行真人
上白天尊曰緣何得此威神下降凡世收除
魔鬼救度群生免遭橫死日有所益伏願大
慈允臣所請於是天尊命玉皇上帝降詔紫

微陽以周武伐紂平治社稷陰以玄帝收魔
間分人鬼

朝覲天顏

爾時元始天尊凭几玄駐須臾之際紫金之
光自衆光出碧霄凝縷文著召真五氣相迎
洞照無間衆瞻光相凝睇之間玄帝已至長
跪天尊前曰臣已奉玉帝勅命位鎮北方今
日何緣特蒙召命得親慈顏
天尊告曰吾於大會說法忽有下方黑毒怨
氣衝上天界大衆咸驚汝宜往彼收斷妖魔
拔濟魂爽

降魔洞陰

上賜玄帝披髮跣足金甲玄袍卓肅玄旗帝
敬奉教勅都領六丁六甲五雷神兵巨虬師
子毒龍猛獸下降凡界與六天魔王戰於洞
陰之野是時魔王以坎離二氣化蒼龜巨蛇
變現方成帝以神威攝於足下
記云潼川府中江縣古名玄武縣有一山
名武曲山乃昔
玄帝追魔至此山攝水火二真於足下因

此而名至今居民呼之山有觀乃宋大觀
間徽宗御賜真靈觀額以表玄帝降伏天
關地軸之福地也觀前江中之石山中之
草木俱有龜蛇之形人病煮水飲之即愈
今益州之龜城梓州之蛇城尚記當時之
遺跡也

分判人鬼

玄帝到下界七日之中天下妖魔盡皆收斷
人鬼分離冤魂解散逝魄超昇鎖鬼衆於鄴
都大洞之中人民始安陰陽交泰國土清平

凱還清都

玄帝與諸神將凱還清都上元天宮朝見
天尊曰昨奉教命往下界收斬妖魔仗慈尊
力乃於七日內天下邪鬼並皆清蕩天尊告
曰汝等諸神得無勞乎卿在太初先天之前
本北方五靈玄老太陰天一始炁之化乃萬
象之根今經二千五百年合還本方歸根復
位於是元始乃命玉皇上帝宣降玉冊拜玄
帝北極鎮天真武遊奕三界都督判佑勝府
之職是以玉帝尊奉元始教命即降聖旨下

金闕翰林玉華院撰成玉冊則金闕侍經司
 玄學士大丹真人文也冊曰惟卿混黃炁之
 瑞道備九陽之尊德隆仙品威貫神真出號
 三千五百春秋功齊四十二劫甲子校遷民
 庶無失毫分茲以數運大劫邪正混同感生
 六天魔王傷害九地黎庶儻非真力何得清
 寧三清是賴九聖得依再扶道法之隆又復
 邪魔之正降水火二精於掌握攝甲庚兩將
 於紀綱因茲神化萬彙咸榮功高衆聖難盡
 褒崇當容返本還源理許歸根復位若不微
 稱焉可顯德重書錫降厥勿謙辭可特拜鎮
 天玄武大將軍三元都總管九天遊奕使北
 極左天罡三界大都督神仙鬼神公事判玄
 都佑勝府事依前太玄元帥判元和遷校府
 事冊到奉行

復位坎宮

上帝命玄帝曰卿可當披髮跣足躡踏龜蛇
 建阜轟玄旗躬披鎧甲位鎮坎宮天稱元帥
 世號福神每月下降操扶社稷普福生靈億
 劫不怠輝光日新而帝欽奉詔已而嘆曰昔

吾為人時入太和山鍊道蒙本師紫元君所
 誠云昇舉之後五百歲當披髮跣足躡坎離
 真精歸根復位上為輔臣下作大聖方得顯
 名億劫與天地日月齊升今日果符師語復
 位坎宮豈不快哉自斯玄帝千變萬化為主

教宗師分身降世濟物度人無邊無量洞天
 福地無不顯靈感應事跡簡冊難窮或宗李
 而為姓或繼郭而為姓或從裴而為姓累代
 欽崇至于今日普天衆生感帝恩者高厚如
 天地之廣豈筆舌究其津極者哉而帝位居

金闕之貴總統樞機陶鑄群品佐天罡大聖
 真君調理四時運推陰陽造化萬物莫極崇
 高矣况帝以道德開化天地湛然默有成功
 之理無一時不念衆生無一刻不憐下土每
 知劫數必先以開濟之誠上奏金闕丐減分
 數至於蠻夷稽夏易教改名亦行教化可謂
 大慈大悲普救無上法王也

玉京較功

昔在上天真化三年五月初五日
 元始上帝上清上帝太清上帝在玄都玉京

山九霄梵炁之上玉清聖境清微天中玉宸
 殿內大會九霄上帝十極高真三界萬靈皆
 集是殿考較諸劫功過是時

無上至尊昊天玉皇上帝總領紫微上宮天
 皇大帝紫微中宮北極大帝后土皇地祇三

十二天帝君三官四聖日帝月皇五星四曜
 森羅萬象地水群真各各嚴肅上朝三清並
 至玉宸殿整班朝禮是時元始上帝登命九
 天司馬侍仙玉郎開玄精玉笈大丹碧匣出
 萬天素威功過玉曆乃勅金闕侍中司馬大

神韓君丈人司命可韓真君司錄定名玉曆
 真君司功九天採訪真君司過九天儲福真
 君開曆考較諸天真宰自昇真得道位居金
 闕以來功過大小所考五老十一曜二十八
 宿五方五斗星君各主司化陰陽經緯自太
 古至今功高一千萬劫並齊無上天尊之位
 中考三官四聖自太虛開化神一挺生所有
 保天佑地之功已當五十萬劫當亞天帝之
 位由是諸天推舉三界所尊元始頒降玉曆
 下示金闕三省推考聖功果與三十二天帝

君功德並隆是以昊天至尊將三官四聖並拜帝真之號於上天真化四年正月初一日金闕三省降詔中天高上玄都紫微宮宣詔三官四聖並赴三天門下館于玉閣乃命金闕左侍翰林清玄學士司文真君金闕右侍翰林寶章學士司經真君鎮玉華院譔製玉冊至是月十五日上元節進封三官四聖帝號冊以玉板刻之金書以雲錦寶囊盛之瓊玉匣之金龍鑰之玄帝玉冊曰維無上大羅天真化四年正月十五日上元節金闕玉宸三省謹言皇皇大道赫赫至真太景開判玄元化生妙蘊樞機萬天尊仰則為聖明主務其休隆廣焉敢不崇欽惟太玄元帥鎮天玄武大將軍三元都總管九天遊奕使左天罡北極右負三界大都督領元和遷校府公事判玄都佑勝府事太上紫皇天一真君靈通太妙上開混沌之玄道備鬱明下統虛危之宿撫成地紀實育天元持造化於四時推紀綱於八節分身下降普福乾坤功齊五十萬劫德並三十二天九霄上賴於真威十極仰

依於神化有大利施之於下民積聖德編之於玉曆按遵簡錄當亞帝真不有微崇何以明德謹遣金真紫陽大夫金闕侍中素靈殿大學士主管三天金闕門下直日儲靈典奏事合光上德仙軒轅執本齋捧玉冊金書上尊號特拜玉虛師相玄天上帝領九天採訪使夫道生一炁威化三才結真于九極之華晨麗於六天之秀幽微燁燁洞杳飛芒功高難極合示嘉尊想惟覽觀幸勿謙辭惟當上輔大道劫劫長存下佑兆民綿綿水社龍文昭降永秘玄都謹言

瓊臺受冊

是時玄帝與上天官中元地官下元水官天蓬元帥天猷元帥翊聖真君以上元日並受帝號於七寶瓊臺之上
昊天至尊親行典儀與凡世帝王拜大將開國承家之儀頗同
上賜帝瓊旌寶節九龍玉輦其冠則通天十二旒其服玄衮上施日月山龍物象皆與世間天子者同圭以玄玉履以紅舄于今群真

朝禮

昊天至尊則四聖為都班之首

天宮家慶

玄帝拜玉虛師相玄天上帝號之後崇封聖父曰淨樂天君明真大帝聖母曰善勝天后瓊真上仙下陰天關曰太玄火精合陰將軍赤靈尊神地軸曰太玄水精育陽將軍黑靈尊神並居天一真慶宮因茲三界仰稱曰玄帝也

紫霄禹迹

按九丘經緯天地曆云禹平水土之後分治九州拜立五嶽定封四瀆範圍坤厚名山大川悉以神靈主之乃考翼軫之下有山名曰太和七十二峰凌聳九霄氣吞太華應七十二候上古所傳云是玄武得道飛昇之地觀是山也雄麗當陽九宮皆備非玄武當之孰可享邪遂更太和之名曰武當山建宮曰紫霄官專為崇奉
玄帝香火之所自後神仙卜棲者衆矣

甘露應禱

記云大唐貞觀間歲值苦旱朝廷下詔有司
 禱于天下名山大川是時武當軍節度使姚
 簡奉命躬詣武當紫霄宮齋醮致禱建壇之
 夕有五儒士丰貌殊異敬來謁簡延坐久之
 從容語簡曰予五君非凡之儒乃五氣龍君
 也准玄帝勅命守護此山非一日矣為子正
 直寡慾祈禱精嚴故來相訪少頃雲氣迷目
 甘雨霈然遂失五君所在矣

五龍唐興

是時枯槁復甦歎回為稔人皆享昇平之樂
 免溝壑之患姚簡其茲靈異奏聞太宗降旨
 就武當山建五龍觀以表其聖跡自此姚簡
 心慕至道志樂清虛拳拳不怠遂起掛冠之
 想乃挈家隱居武當恪事
 玄帝香火繼蒙授記命充本山之神血食均
 陽今名為威烈王是也臣每夢玉曆得覽玄
 源久謂玄帝事跡出於太古國記湮蕪世傳
 訛舛未究宗因念欲編謨實錄降付名山綠
 以時未際會少阻殷勤玄帝自宋啓運以來
 下世福佐社稷今將四甲子矣行化國內分

野別建紫虛靈壇普度群品而臣又得參侍
 靈軒日親宸陛特因暇日考績三洞玉書校
 成實錄不敢以鄙語雕誣繪素大德蓋撫諸
 實也謹須示中上庶幾萬世之下以永其傳
 則仰知

玄天上帝本乎空洞之先大道之祖豈可與
 其餘神聖同倫而語哉亦足以發明武當之
 源豈不暢美者乎時在上天延康七劫無上
 大羅天開化十三年下世宋上元甲子太歲
 甲辰淳熙十一年正月辛卯朔十五日乙巳
 太真西王左上卿上清天機都承旨神應元
 惠真君飛霞靈光真人中黃先生巨靈素皇
 謹撰

武當發願

南陽武當山真武初學業過豐乾大天帝君
 賜劍名曰北方黑龍象角斷魔雄劍長七尺
 二寸應七十二候撫三輔應三台降伏不祥
 之事重二十四斤應二十四氣斬邪歸正不
 侵邪見之道橫闊四寸八分應四時八節常
 在人間定除災禍因得從吏天罡河魁於靈

仙山降伏天下水火二精青龜赤蛇一切妖
 魔與為患於世者盡皆潛伏真武往問
 老君曰蒙囑付於武當山若能降伏世間一
 切妖魔了當即與授記成其正真之道臣今
 降水火妖精歸於足下但係種種群魔皆已
 潛伏告師授記老君曰汝來授記還修得甚
 果老君以一手指天一手指地乃天地尚存
 人間妖魔何得潛伏候取得閻羅王同來方
 可授記閻羅王若來見吾即是無地獄人也
 無善無惡無天無地得同汝一處授記乃為
 無上正真道果汝且更修其果為眾生斷除
 邪道增益功行真武從此復降武當山寄凡
 修行一十二年忽一日受

玉皇金錄差充北極佑勝院都判人間善惡
 公事提點生死罪錄乃授消災降福神將每
 月定一日下降及庚申甲子日亦如之有發
 願文云眾生善惡與我齊身我登證果亦同
 其因

谷岳修果

隋朝有南康軍廬山太清天慶觀光德元年

三月三日江西路安撫使張祐之入山遊觀有洞名曰谷岳張祐之領從人入洞方行二十餘步覺身心迷惑遂出洞門據左右報有軍虞候何詮入洞不見蹤由約二時以來何詮從洞中出其遂因依詮入洞行二十餘步聞洞中有人勘算文字遂隨語聲處尋路行半里見一宮殿虛聳上有三位燕會下有判官符吏數百人將簿書點算人間善惡之事詮子細觀望見有龜蛇在前戲躍知是北方真武見主席是王者冠服對坐是女真乃鳳冠霞履真武位在其側詮潛入從官隊仗求問所因符吏曰洞是谷岳天名瑤玉今日是真武降生之辰每年至此日蒙北極給假於丑時辭北方至寅時屆東方面禮本師太上老君就羅浮天宮請侍父母於卯時從申酉方下界遊奕察其善惡與父母修人天道之果此日若察錄得造惡之人罪重如須彌山者皆獲真武洎承父母布施慈悲之賜成蒙解釋世人有知今日之因若清淨戒心齋獻詞章懇求恩福最為大矣詮欲子細

視之不覺如夢寐驚覺立身在谷岳洞門石臺下張祐之備錄聞奏從此方知三月三日是真武降生之辰為民消災降福奉聖旨下南康軍委官往廬山天慶觀建立真武并父母降真寶殿及給公據揀放何詮

玄天上帝啟聖錄卷之一

正一天師清微弟子 洪百堅

道教學術資訊網

玄天上帝啟聖錄卷之二

流三

歸天降日

唐則天朝有門下侍郎裴濤劄子奏聞臣濤昨蒙差充西郊縣令忽夜夢見

太上老君下降入於卧所告云唐朝將有邪禍妖臣闖亂國政不能剪除是謂大患有北方神將名曰真武合注下界修第四次天行因果合當在濤家寄胎降世其妻乃生男仲方近國家收戮西蕃趙弘二千邪寇生擒回國并驗本朝奸佞賀全龍五百妖童與民間斬滅邪禍救護不少今為臣男仲方曾受神應將軍於是傳播天下漏泄天機一日臣與妻語論次其男於座前放開兩手有朱砂肉跡篆字臣將辯認其左手心真字右手心武字繼捨雙拳更不放開乃取香湯沐浴更換淨衣告辭父母而去如要相見祇於每月一次下降時普為天下修善之人消解罪惡臣告仲方今既捨父歸天未審後來每月下降在於甚日今從何往仲方曰復歸北關若要知吾下降日分正月七日二月八日三月九